

# Wiederholung

Su schwätze mir

## Dat Konterfei!



■ Von Katharina Schaaf

Die Uhma gieht zom Fotograf,  
se moß e Passbild han.  
Se huckt sich off dat Stöhlche brav.  
säht zo dämm goode Mann:

„Nau knipst mich von der beste Säit,  
en bont – dat wär ganz scheen.  
Sie wesse jo – su ahle Lait  
sain net mie fotogen.“

Dä Chef mäint: „Alter spillt kai Roll,  
dat fräindliche ‚Gespinz‘  
micht su e Bildche stimmungsvoll!“  
Dann guckt ä dorich die Lins.

Ä seht dat weiß gescheitelt Hoor,  
die bont geblönte Blus,  
reeft stolz: „Dat Konterfei wierd klor.  
Frauche – dat es kai Schmus!“

„Jetzt hallen'se dat Köppche huh  
on gucke zo mir her!“  
Die Uhma lacht, wierd richdisch fruh,  
„Köppche“ – dat hiert se geer.

Die Bildcher sain dann och tipp-topp!  
Dank an dä Fotomann,  
dä met Humor – en ahle Kopp –  
zom „Köppche“ mache kann!

8. Aug 2009  
Kath. Schaaf